

In niev «gidonter» pigl idiom sursilvan

Dacuort ha la Surselva Romontscha presentau in niev carnet cul tetel «miu gidonter». L'autura Laura-Alessia Arpagaus ha rimnau en quel 1300 plaid. Igl ei in mied didactic ludic-auditiv per egl ed ureglia.

Augustin Beeli/FMR

Il cuntegn ei concentraus sin 54 paginas. Mintgina ei dedicata ad ina tematica. Ins vegn menaus dalla meisa tochen tier la vestgadira, empren d'enconuscher il bein puril, ils firaus, las emoziuns, vitg e marcau. 49 spartas dil mintgagi ein representadas. «Model ei il cudisch da Luzi Cadruvi staus», declara *Laura-Alessia Arpagaus*. Igl ei in gries carnet el format A4.

In passun, da 1977 el 2022

En in capetel scriva ella dil punct da partenza per quei project, e tgei che la Surselva Romontscha spetgi dad ella. La giuvna da Sagogn ei sededicada en sia lavur da diplom alla Scola mercantila Surselva al project «miu gidonter». Igl ei l'emprema ediziun d'in mied didactic cun quei tetel. Scolast Luzi Cadruvi da Ruschein haveva ediu quel 1977. Lu deva ei aunc nuot auter che gross vocabularis, ils brins sursilvan-tudestg e tudestg sursilvan da Vieli/Decurtins.

45 onns pli tard ha gl'idiom sursilvan puspei duvrau sustegn. «Cun cumbinar cul digital ei quei in product innovativ. Ins duess cuntinuar cun quella fuorma, pertgei ei sto esser enzatgei persistent», declara il president dalla Surselva Romontscha, *Toni Vinzens*. Pér il zercladur eis el vegnius elegius sco successur dad *Alberto Palaia*. In meins pli tard ei il «gidonter» niev da 2022 cumpariu. «Ei duei esser in sustegn per persunas ch'emprendan romontsch», declara Toni Vinzens. Siu antecessur haveva empuniu il contact culla classa da diplom dalla Scola mercantila Surselva. Ina dallas scolaras, Laura-Alessia Arpagaus, ha giu tschaffen da concepir il niev «miu gidonter». L'ediziun 2022 sedifferenziescha pulitamein da quella dil 1977. Il temps ei buca sefermaus. La maschina da scriver electrica ed auters apparats electronics ein vegni cuntinuadamein silla fiera. Sin pagina 15 da «miu gidonter» ha l'autura rimnau 20 apparats «novs», il telefonin ei il pli impurtont. Oz san ins schizun envidar la pegna cun quel.

Il niev mied d'emprender ei lu era colligiaus cun quei pign apparat digital multifunziunal. Mintga pagina cuntegn in code QR. Cun quel arrivian ins silla pagina digital-auditiva e cun dus clics sesarva ella. Persunas che vulan exercitar la pronunzia, san far quei cun tedlar e plidar mintga plaid. Vitier ha l'autura creau mintgamai diesch construcziuns. «Era quellas san ins tedlar e trenar», gi ella el discuors culla FMR.

La fin da zercladur ha la giuvna autura finiu siu scolaziun propedeutica a Glion. Ella vegn ussa ad absolver ad Aschera il cuors preparativ per la Scol'aula da pedagogia a Cuera. Sia finamira eis ei da daventar scolasta. Ils resuns ed il sustegn finanziel ch'ella ha retschert pil niev mied motiveschan ella. «Jeu sun engrazievla ch'jeu hai astgau realisar quei mied», gi la futura studenta. Il president dalla Surselva Romontscha, ch'ei editura da «miu gidonter», aschunta: «E nus essan engrazievvels ch'ei dat persunas sco Laura-Alessia che s'engaschan activamein pil romontsch».

* Il carnet «miu gidonter» san ins empustar tier la Surselva Romontscha (www.surselva-romontscha.ch), Ligia Romontscha (www.liarumantscha.ch) ni tier la proxima libreria (cun indicar la numra ISBN-13: 978-3-03900-921-3).